

Sì. Gea. Ja zum Sprachengesetz

Pro Lescha da linguas dal chantun Grischun, 7001 Cuira

Communicaziun a las medias

La campagna per la lescha da linguas è lantschada

La nova Lescha da linguas dal chantun Grischun vul rinforzar la trilinguitad en il Grischun ed uschia er sustegnair il rumantsch ed il talian. La campagna lantschada oz a Cuira en vista a la votaziun dals 17 da zercladur 2007 duai render attents ils Grischuns e las Grischunas a lur identitad creschida istoricamain.

Mesemna, ils 25 d'avrigl 2007, ha il comité Pro Lescha da linguas dal chantun Grischun lantschà a Cuira la campagna da votaziun. La finamira da la campagna è da mussar quant impurtanta che la trilinguitad è per noss chantun. Ella è in element essenzial da l'identitad grischuna. Questa particularitad e caratteristica simpatica vulan ils aderents mantegnair era vinavant en noss chantun. Els vulan manar ina discussiun objectiva davart la lescha da linguas e cumbatter per in chantun culturalmain e linguisticamain interessant e renconuschì.

La votaziun vegn beneventada

Il comité Pro Lescha da linguas dal chantun Grischun beneventa il fatg che las Grischunas ed ils Grischuns pon s'exprimer davart la lescha da linguas ed uschia decider tge impurtanza che la diversitad linguistica duai avair en il Grischun. A basa da la nova Constituziun chantunala è ina lescha da linguas indispensabla e la discussiun davart ina tala è impurtanta e preziosa. Ils aderents da la lescha èn persvas che la populaziun grischuna s'identifitgescha cun la lingua e cultura rumantscha e vegn perquai a s'exprimer cleramain a favur da la lescha.



Plivalur grazia a la trilinguitad: triling.ch

La nova lescha da linguas dat a las Grischunas ed als Grischuns la chaschun da contribuir a la trilinguitad grischuna ed uschia er sustegnair il rumantsch ed il talian. Da questa trilinguitad profiteschan blers secturs da la vita sociala, surtut il turissem, l'economia, ma era la politica e la cultura. La trilinguitad renda noss chantun unic e singular. Ils aderents na vulan betg che questa particularitad giaja a perder. Per infurmar detagliadamain ina vasta publicitad ha il comité Pro Lescha da linguas dal chantun Grischun endrizzà la pagina d'internet www.triling.ch.

Ina lescha differenziada

La lescha da linguas vul sustegnair las vischnancas rumantschas e talianas al cunfin linguistic e rinforzar uschia lur situaziun linguistica tradiziunala. „Per las bundant 100 vischnancas tudestgas na sa mida nagut“, ha ditg Vincent Augustin, co-president dal comité Pro Lescha da linguas dal chantun Grischun, a l'orientaziun da las medias a Cuir. „Nagina vischnanca na vegn sfurzada da revocar ina midada da lingua gia realisada“, declera Augustin. Las disposiziuns transitoricas da la lescha menziuneschan cleramain che bleras vischnancas n'èn betg tangadas da la nova regulaziun. Sch'ina vischnanca ha midà la lingua uffiziala e la lingua da scola dal rumantsch u talian al tudestg e/u a la bilinguitad avant che la nova lescha da linguas entra en vigur, na sto ella midar nagut.

Campagna cun personalitads prominentas

Per lur campagna da votaziun cun l'adressa www.triling.ch - betg finanziada cun daners publics - han ils aderents da la nova lescha da linguas pudì gudagnar personalitads prominentas da differents secturs. Quellas apprezzeschan la trilinguitad dal Grischun e s'identifitgeschan cumplainamain cun quella. En inserats e sin placats vegnan ellas a s'exprimer davart la lescha da linguas e s'engaschar uschia per la trilinguitad. Ultra da quai èn planisads divers podiums, occurrenzas d'infurmaziun, sco era in'acziun d'identitad a la Higa, per integrar ina vasta populaziun en la discussiun da votaziun.

Cuir, ils 25 d'avrigl 2007

Contact per las medias:

Gion A. Derungs, Pro Lescha da linguas dal chantun Grischun, 7001 Cuir
Telefon +41 (0)81 258 32 22, www.triling.ch

